

Espectaculo Local

Tremendo concierto 'Wardami' riba Freewinds di Jonathan Croes & Friends



ORANJESTAD (AAN): Recientemente a tuma lugar concierto riba Freewinds di Jonathan Croes & Friends, na unda cu Edjean Semeleer, cantante local, organizador di concierto y representante di 'Go Cultura Foundation', un fundacion cu a wordo lanta oficialmente aña pasa, e concierto a elabora cu e concierto a haya titulo di 'Wardami'.

Wardami ta un concierto cu 'Go Cultura' a organiza pa recauda fondonan pa Jonathan Croes, mirando cu e ta bay afo pa sigui cu estudionan y cursonan den mundo artistico, mundo di musica.

Segun Edjean, e fundacion ta kere hopi den stimula hobennan talentoso, y nan ta bezig cu hopi proyecto, y esaki tabata un di esnan mas special cu nan a organiza te awa, pasobra simbolicamente nan ta yudando un hoben cu ta bay sigui desaroya su talento afo.

E concierto a conta cu participacion di Kiziah Trimon, Robert Jeand'or, Danilo Vrolijk, Mariachi Luz de Luna, Edjean Semeleer y Jonathan su orkestra, den un alianza cu Freewinds, cu tin mas di 30 aña ta biniendo Aruba y semper nan ta pone

nan ballroom y banda disponibel pa yuda comunidad di Aruba.

Edjean a indica cu nan ta hopi contento cu apoyo cu comunidad a duna na e fundacion y na e cantantenan tambe. El a bisa cu tabata hopi great pa wak hopi hoben presente y cu esaki ta stimula nan pa sigui desaroya nan talento. E ta enfatiza cu pa nan ta importante pa bay mas leu y impacta y inspira otro hobennan. Manera ta bisa na ingles, bo ta bira manera un 'agente of good' y esaki por tin su impacto, no solamente economico pa sociedad, pero den parti social tambe ta yuda hopi, mirando cu tin hopi hoben cu talento na Aruba, pero no tin hopi plataforma pa nan por expresa nan mes. Esaki ta un di e motibonan cu e fundacion a wordo crea, pa trece conscientizacion den pueblo con importante e ta pa kere den nos talentonan local, y no sinta warda pa otro duna bo oportunidad, sino empodera bo mes pa asina bo bay dilanti den bida.

Edjean a bisa cu nan lo sigui cu nan trabaonan pa stimula y empodera comunidad y nos talentonan local.

